

INUIT ATAQATIGIIT

Inatsisartuni



26. Juni 2025

Inatsisartut Suleriaasianni § 37, imm. 1 naapertorlugu Naalakkersuisunut uku apeqqutigaakka:

Apeqqutit:

1. Naalakkersuisut Air Greenlandip RAL-illu nioqqutissanik assartuiniarneranni sunik piumasaqaateqartarpat?
 - a) Nioqqutissanik ulluinnarni pisariaqartinneqartut pillugit sullissineq pitsanngortinniartorlugu Naalakkersuisut qanoq iliuuseqalersaarnertik nassuiassagaat qinnutigineqarpoq.
2. Air Greenlandimut RAL-imullu immikkut suliniuteqartoqarnissaa ajornanngila, taamaalilluni taakku nioqqutissanik ulluinnarni pisariaqartinneqartunik assartuinnerminni annertunerusumik iliuuseqalersinnaaqullugit?
 - a) Akissut aappiuppat, ingammik ingerlatsinerup annikiffiani nioqqutissat pisariaqarnerpaat isumannaatsumik isorliunerusunut anngunneqartarnissaat pillugu Naalakkersuisut nassuiaateqaqquneqarput.
3. Nioqqutissat ulluinnarni pisariaqartinneqartut akiisa apparsimaartinnissaannut periarfissat suuppat, tamatumani ingammik KNI Pilersuisumi?

(Inatsisartunut ilaasortaq Nivi Rosing, Inuit Ataqatigiit)

Tunngavilersuut:

Ullumikkut isorliunerusuni pilersuinerup isumannaatsuunera ilungersunartorsiorfiuvoq, ilaatigut Air Greenlandip timmisartuussinissamik taamaatitsiuarnera kiisalu RAL-p ilaatigut sikoqartarnera patsisigalugu umiarsuarnik tulatsitsiniarnermini ajornakusooruteqarnera patsisigalugu. Tamanna innuttaasut nioqqutissanik ulluinnarni pisariaqartitaminnik pisisinnaanerannut toqqaannartumik

kingunerluppoq. Taamattaaq internetimik atuisinnaaneq pitsaassutsitut naatsorsuutigineqartut pitsaatiginngilaq, innaallagissamillu imermillu pilersuinermit killilersuineq inuussutissarsiornermit ineriartortitsiniarnermut killilersuivoq.

Tamakku tamarmik innuttaasut isorliunerusuni najugaqartut pisortat pisariaqartunik sullissinerannut ulluinnarnilu nioqqutissanik pisariaqartinneqartunik, inuiaqatigiinni atugarissaarfiusuni pinngitsoornani pigisariaqaraluakkanik pissarsisinnaanerat ajornarnerulersippaa.

Maanna kiisa sullissinermit periutsit nalinginnaasut naammassineqarsinnaajunnaarnerat killiffigaarput. "Taamaattuaannarnikuuvoq" sumulluunniit atorneqarsinnaanngilaq. Taamaammat maanna Tunumi pisortat sullissineranni aqputinik nutaanik suleqatissanillu allanik ujarlernissamut piffissanngorsoraara. Taakku tassaasinnaapput sullissisut nutaat imaluunniit usinik ilaasunillu kiisalu oqarasuaatikkut internetikkullu sullissinermut ilassutitut isumaqatigiissusiornerit.

Ullut qulit ingerlaneranni apeqqutima akineqarnissaat qinnutigaara.